

**DETAIL STATEMENT (MIZO) OF THE PUBLIC HEARING FOR OIL
EXPLORATORY DRILLING TO BE UNDERTAKEN BY OIL INDIA Ltd., NEAR
PHULMAWI VILLAGE, AIZAWL DISTRICT**

**VENUE : COMMUNITY HALL, PHULMAWI, MIZORAM
TIME : 30th August 2011; 12:00 Noon**

Thuhma:

Oil India Ltd. (OIL) leh Shiv-Vani Oil & Gas Exploration Services te tangkawp chuan India sorkar nen NELP-VI hnuaia Block MZ-ONN-2004/1 huamchhungah hydrocarbons zawn leh laihchhuah intawm inremna (production sharing contract) an ziak a. OIL hian 85 % participating interest (PI) a neih laiin Shiv-Vani Oil & Gas Exploration Services hian 15% PI a nei thung . Block MZ-ONN-2004/1 hi Mizoram laihawl vela awm niin Lunglei, Serchhip, Aizawl district bakah Mamit district thenkhat a huam a. He block hi Mizoram khawpui ber Aizawl chhim lamah awmin a zauzawng hi 3213 sq. km a ni. Inremna, PSC-angin OIL hi he block chhunga thawk tura tih a ni.

Tunhmain he lai bial chhungah hian Oil zawnchhin a la ni ngai lo. He lai vel ramchhungah hian zirchianna chi hrang hrang 2-D Seismic Survey, Gravity Magnetic Survey, Geochemical Survey-te neih zawh tawh a ni a, 3-D surveys pawh tih mek a ni. He zirchianna atang hian OIL chuan an inremna-a Minimum work programme angin a thawh khatna atan kum 2007-2012 chhungin hmun 5-ah verh leh enchhinna neih a tum a; thawh hnihna chu kum 2012-2015 chhungin hmun khat-ah neih leh tur a ni ang. Heng khurte bakah hian PSC-in a sawi angin oil/gas te hi a awm ngei a nih chuan lak chhuahna turin additional appraisal/delineation wells te pawh verh leh a ni ang. Aizawl khawpui hi be block hmar lam ber atangin km 5 vel a ni nghe nghe.

He public hearing hi hydrocarbon zawnna tura lei verhna tur project chungchangah a bul vela cheng mipuite ngaihndan leh rawtna lakkhawmna tura buatsaih a ni.

He Vantlang Inrawnkhawm (Public Hearing) hi Pu J. Hmingthanmawia, Additional Deputy Commissioner, Aizawl District-in kaihruaiin, a ni, hun leh hmun ruatsa ang takah neih a ni a. Mi chi hrang hrang an lo kal khawm. Inkhawm kaihruaitu hian lo kal khawmte lawmna thu a sawi zawhin he inkhawm neih a tul chhante a sawifiah a. Oil zawn hna hi Central Sorkar hmalakna a nih thu te, Oil India Limited hi he ram biala thawk tura thlan an nih thu a sawi a. He mi zawh hian, Khawtlang hruaitute leh State Sawrkar mi pawimawh te mipui lo kal khawmte hnenah a inhmelhriattir a. Chungte chu:

1. Village Council Members, Phulmawi
2. Village Council Members/Young Mizo Association(YMA) hruaitute, Tlungvel
3. Phulmawi & Tlungvel khua atanga mipui lo kalte
4. Pu Lalhmachhuana, Sr. Geologist, Geology & Mineral Resources Department, G.O.M
5. Pu Lalbiakkima, Jr. Geologist, Geology & Mineral Resources Department
6. Pi P.C. Lalmuanpuii, AEE, Mizoram PCB,
7. Mizoram Pollution Control Board-a thawktu dangte

Inkhawm kaihruiatu hian Pu C.Laldinkima, Geologist, OIL chu an company mite hmehhriattirna nei turin a sawm leh a, chungte chu:

8. Pu Khargeswar Saikia, Chief Engineer, Drilling, OIL
9. Pu S.K Dutta, Head Drilling, OIL
10. Pu S.K. Mishra, Chief Chemist, OIL
11. Pu C. Laldinkima, Geologist, OIL
12. Pu M.P. Chaliha, Manager (Public Relations)
13. Pu Amitabh Goswami, Administrative Officer
14. Pu Pranjal Buragohain, Consultant, Greentech E.E.C
15. Pu Zothansanga, Transport Department, OIL

Hemi zawh hian, inkhawm kaihruiatuin Pi P.C. Lalmuanpuii, Asst. Environmental Engineer, Mizoram Pollution Control Board chu he Vantlang Inrawnkhawmna koh a nih chhan sawfiahturin a sawm a. A ni hian 'Environmental Impact Assessment Notification' hnuaiarah ram hmasawmna project lian tham reng rengin Ministry of Environment & Forests, G.O.I atanga Environmental Clearance an mamawh thu leh chumi atana he vantlang inkhawm hi neih ngei ngai a nih thu a sawi a. Danin a phut anga vantlang inkhawm hriattirna pawh Vanglaini leh Times of India chanchinbu-ah chhuahin hemi ni 30 chhunga Company-te buatsaih draft Environmental Impact Assesemnt Report pawh en theiha dah a nih thu a sawi bakah hemi hun chhung hian khaw mipuite atanga rawtna emaw ngaihdan emaw thehltut an awm loh thu a sawi bawk. He inkhawm hi Oil India Limited tan ni lovin mipuite ten he project-in a environment a nghawng tur chungchanga an ngaihdan lakkhawmna tur anih thu leh mipui phalna lakna tur erawh a nih loh thu a sawi bawk. Tin, he inkhawmna-a thu leh hla zawng zawngte ziaka record vekin, a video te nen Ministry of Environment & Forests-ah thawnthlak tur a nih thute a sawi a. Mipuite pawh project chungchanga an ngaihdan te tlang taka sawi chhuak turin a ngen bawk.

Hemi hnu hian Inkhawm kaihruiatu chuan Pu C. Laldinkima, Geologist, OIL chu project chungchang sawifiah turin a sawm leh a. Ani hian he project-a kan tawng hriat ngai loh hrang hrang 'explore', 'produce', 'transport', 'refining' te a hrilhfiarah hmasa a. OIL hnathawh dan leh an hna kalpui dan turte a sawi bawk. Map hmangin an hnathawhna bial chhungin Districts pali, Aizawl, Lunglei, Serchhip leh Mamit district a huam tur thu leh thawh khatnaah khur nga (5) leh thawh hnihnaah khur khat (1) laih an tum thu te a sawi bawk. Laihna tur hmunn atanga 10 km huamchhungah environment chungchang zirchianna an neih thu sawiin, a lem nen an verhna hmanruate, a laih dan te sawiin km nga (5) a thuka laiin, a mawng lamah a zuih thlak tur thu te a sawi bawk.

He project atana helai bial chung zirchianna an lo neih dante sawiin lui tui leh boruak that dan te, a ram leilung chanchinte, thlawhhma awmte, sik leh sa, ruahtui tla zat leh a hnawn dante a hrilhfiah bawk a. Tin, hnathawhna atana tui an mamawh tur zat chu a verhna khawl atan 25-30 KLPD, chirhdiak siam nan 10-15 KLPD leh khawl sa tihdaih nan 3 KLPD a nih thu a sawi a. An hnathawhna atanga pollution awmtir theitu hrang hrang sawiin rikrum thil thleng palh thei te leh a venna hmanrua chirhdiak dahkhawmna atana khur te leh khur puak venna tur Blow Out Preventor (BOP) chungchangte a sawi bakah accident thlen palh pawha hma latu tur mithiam bik dah an nih tur thu leh bawlhhlawh sawngbawltu pawl hran an siam tur thu a sawi bawk.

Project chungchang ngaihthlak a nih hnu hian Inkhawm kaihruaitu chuan mipui lo kalkhawmte chu an ngaihdan chi hrang hrangte zalen taka auchhuahpui ngam turin a chah a, Tichuan, sawihonain zuiin a hnuai mi ang hi sawihona chipchiar te chu an ni:

1. **Pu Zohmangaiha, President, Tlungvel Venghlun Br. YMA:**

“ Kimchang takin kan ngaithla a, a verhna khawl inngahna lianpui leh quarters han awm chuk vel khan ram eng anga zau nge a mamawh ang a, a hnathawhna atan Tlungvel leh Phulmawi mipui te tan inhlawhna ang chi a awm ve thei ang em?

OIL: *“Kan hriatthiam theih dan turin Aizawl lammual chanve ai chuan a te thei lovang. Hnathawk atan kuta thawh chi a awm a nih chuan a theih chin chinah khaw mipui tan kan ti ang.”*

2. **Lalrinawma, Tlungvel Primary zirtirtu pension:**

“A lema min entir ang khan ram chu in duh zau dawn hle mai a, mimal huan leh ramte a awm hlawm a, in khawih chhiat turah zangnadawmna a awm thei ang em?”

OIL: *“Mimal emaw vantlang ram emaw pawh ni se, a ram hlut zawng ang hu kan pe ang.”*

Chairman: *“Ram chungchang kha kan tuihnih hlek ang a, a panna kawng mamawh tur ram kha acquire tur a ni a, company-in proposal an rawn thehlut tawh a ni. Compensation chungchangah chuan in pass neih dan a pawimawh dawn a. VC pass ang chi-ah chuan VC-in inhmun a pe thei a, huan a pe thei lo a ni. Periodic-pata hi huan atana pass pek a ni a, neitu nihna a nei lova, hman phalna chu a nei a. Amaherawh chu huan thlai awm ang ang*

chu sorkar approve rate in kan chhut ang. LSC-ah ve thung chuan District Collector (DC)-in sq.m ang zawng emawin a ram hlut zawng kha a chhut chhuak ang a, chumi ang chuan compensation chu pek an ni ang.”

3. **Pu Lalengmawia , Phulmawi M/S Teacher:**

“Air pollution chungchangah khan SO₂, NO₂ leh Hydrocarbon te hi a chhuah hmel a, boruak che vel avangin kha pollution kha dahkhawl theih a ni dawn si lova, mipui awmnaah a darh lo thei dawn lo a. Mipui lam hawi zawngin khawl kan dah lovang tih ringawt kha mipui tan a him dawn em ni? Damdawiin kan hlat si a, Thingsulthliahah Primary Health Centre kan nei ve a, chuan Tlungvelah Health Sub Center kan nei ve ringawt a, damlohna chungchangah medical privilege ang chi buatsaih theih a ni ang em?”

OIL: “*Air pollution chu diesel generator siam chhuah tur a ni a, oil kang hi chuan CO₂ leh carbon monoxide hi chu a phuh chhuak hrim hrim a, mihring chenna atanga hnai loah kan dah dawn a, in rin anga meikhu hluah hluah ang a awm dawn lo, chuti lutuka pollution siam chhuak tam tur a ni lo, chemical compound chu a pe chhuak ngei ang, mahse ngaihawhawm tham a ni lo vang. Khawlai dunga truck tlanin boruak bawlhhlawh a paihchhuah, helai atanga kan lo ngaimawh teh chiam loh nen a inang deuh reng ang. Tin, thawh hun chhung hi thla 4-5 vel chauh tur a ni. Diesel Generator khu avang chuan dam loh phah an awm lo ang. Keimahni avanga na an awm palh anih chuan mawhphurhna kan la ang.”*

4. **Pu Zosangliana, Tlungvel joint YMA President:**

“In hnathawhna turah hmun in duh zau dawn si a, verh ta ula oil lo awm lo ta se in kalsan mai dawn em ni?”

“Kawngpui NH-54 hi laih zauh belh a ngai ang em?”

“A thlitfimna hi Mizoramah in dah dawn em, nge state dangah in phur chhuak dawn?”

“Labour turin mi engzat nge in mamawh thin?”

OIL: *“Hna kan thawh chhonzawm lo anih pawhin kan thawhna state sorkar atangin advise kan la ang, an thu thu a ni dawn. NH-54 hian kan lu a tihai khawp mai, kan motor lian te hi kan kawngah hian a kual zo dawn si lo va. PWD hotu te nen pawh ramri atanga helai hmun thleng hian kan rawn en vek tawh a, anmahni atangin advise kan la anga hrut mam leh paih hek ngai tam tak a awm dawn hmel a ni.”*

“A thlitfimna kan nei lo. Oil laichhuak ta ila, a tam tham chuan company dang nen inbiakremna neiin Mizoramah pawh refinery dah theih chu a ni a, phurh chhuah zawk tur pawh a ni mai thei bawk. Helamah hi chuan thu kan nei lo a ni.

“Hnathawktu atan chuan mi tha leh mi taima an awm phawt chuan kan chhawr ang.”

5. **Pu P.Lalnunsiana, Phulmawi VCP:**

“OIL ten kan khawtlang a hna an thawh dawn chuan kan mamawh te hi han ngen ve ka duh a ni.

- 1) Khelmual hi lian vak lo kan nei a, kan thalai ten inzirna tha an mamawh hle a ni. Hei hi min siam zauhsak theih chuan a lawmawm khawp ang.”
- 2) Tui lak hi tlem tlem chu kan han la, a tam tham lo hle thin a. Khaw mipui te hi thalah chuan kan buai hle thin a ni. Tlan turin tui zem lian tha tawk tak min siam sak thei ang em?
- 3) Thalai ten eizawna an neih theih nan kawng min siam thei ang em?
- 4) Tin, in hnathawhna tur kawng hi helai kan khaw chhung atang ngei hian chhuak se kan ti hle. A chhan chu kawng hi kan khaw chhung atanga chhuak a nih chuan keini khaw mi te tan sum lakluhna tha tak a ni ngei dawn a, Kan reserve forest hi Aizawl- Lunglei pana kal te pawhin hmuhdawm ti taka an lo thlir ve fo a ni a; chuvangin chuta kawng a kal chuan ven sen a ni dawn lo a, kan hmuh phakah kawng hi siam ni se kan duh a ni.”

OIL: *“Khelmual tih changtlun nan leh sports tihmasawn hi Corporate Social Responsibility hnuai Company-in a ngaihpawimawh tak a ni a, hetiang lam atan hian Company chuan tanpuina a pe thei a ni.”*

“Mipuite mamawh tihhlawhtlin nan Company hian tanpui theihna dan a nei a, Tuizem hi mipui mamawh a nih avangin tanpuina pek theih a ni ang. Helama mithiam chu kan awm chiah lo a, PHE department leh khawtlang hruaitute puihna kan mamawh ang.”

“Hna chungchangah pawh laih hun chhung hian hna nghet lo, hun rei vak lo chhunga thawh tur chi a awm ang a, chutiang hnaah chuan khaw mipui te duhsak bik an ni ang. Hna nghet lo a nih chhan pawh Hydrocarbon kan zawn hi hmuhchhuah a nih hma loh chuan kan zawn zel a ngai a, hmuh chhuah a nih hunah erawh chuan kal phung a danglam deuh tawh ang.”

“Approach road kan tih drilling site panna tur kawng, in khua atanga chhuak tur chungchangah technical deuha ngaihtuah ngai leh survey pawh thutlukna tak siam hmaa neih vek ngai a ni a .Tunah rih chuan in khua atangin emaw, hmun dang atangin emaw kawng a chhuak ang tih sawi a harsa. A chhan chu technical thil tam tak thlira drilling department leh department dangte inrawn hova siam fel tur chi a nih avangin. A changtu department, Mizoram PWD te nen pawh kan thawk ho tha hle a, an Engineer- te pawn thurawn te min pein min tanpui bawk a. Anni thurawn hi la zelin kan kal ang a, civil leh construction work-ah chuan state sawrkar thurawn angin kan kal zel ang. Approach road tih loh kawng awmsa zauh ang chi atan Company CSR activities hnuaiah tanpuina kan pe thei a ni. Tin, CSR activities hnuaia kan thawhnaah hian khaw mipuite thawhpuina ka mamawh zel a ni.

“CSR policy changtlung tak kan nei a, amaherawh hydrocarbon kan zawn hi kan hmuh hma loh chuan heng tihhlawhtlin nan hian min khuahkhirhtu dan a awm ve a. Oil awm leh awm loh kan zawng tan dawn chauh a ni a, a stage a la tir a, thil lian tham a la tih tak tak theih lohva, nakinah Oil emaw Gas emaw a awm a, kan lakchhuah hunah chauh nichina sawi takho kha chu a implement theih dawn a ni.”

Chairman: *“Khaw chhung atangin kawng kal se, in ramngaw in humhim thei dawn in tihna em ni?”*

6. **Pu R.Lalrinmawia, SDO, PWD:**

“An khuaah kawng chhuak ngei se an duh a, hmun dang atanga kawng a kal a nih chuan Reserve ngaw hi open for all a ni ringawt dawn a, a khaw mi ten an lo ven hram hram vanga him chauh a la ni a. Tin, helai atanga kawng a pen khan a hnai sawt dawnin ka hria a ni. Aizawl by-pass road, PWD-in an siam dawn a, Silchar atanga Aizawl lut lovin, Khamrang-Zemabawk-Tuirial-Khumtung a tan tlang dawn a, Oil pawh lo la chhuak ula, chu kawng chu a hnai daih zawk dawn a ni. Tin, nakinah chulai kawng chu a tlang hunah Phulmawi tan khaw extension tha tak a ni dawn a, an khaw tan pawh thil ropui tak a ni dawn a ni. Hemi sawi tur hian Lawngtlai atangin ka rawn haw phah vang vang a ni.”

6. **Pu Zakunga, Tlungvel Loneitu:**

“Helaiah hian lo awm ta ula, eng anga hnaiah nge mipui mimirin thlawhhma kan siam theih ang? Leipui nei leh kawngkal te tan pawh engtia hla nge ngai?”

“A thlitfimna tur hmun chungchangah khan Assam-a refinery awm loh avanga an buaina ang, inthahna ang chi kha a awm ve kan hlau a; chuvang chuan nakina kan thalai te an buai lohna turin a thlitfimna hi Mizoramah dah ngei turin ka ngen che u a ni.”

“Bhopal-a gas leak ang khu a awm ang em? A hlauhawm ang em?”

OIL: “*Kan verhna hmun leh chetvelna tur hi kan hung tlat dawn a, kan hung pawnah chuan in duh ang angin in kal thei ang, leipui pawh in siam thei ang. Mahse kan area pawn chu kan sawi pha lo. ‘Keima sa him nan ka hnaih duh lo,’ in ti a nih chuan kan inhung chin baka min rawn hnaih theih lam chu in thu thu a ni e.*”

“*Leak awm lo tura thawh ngei kan tum. Mahse palh awm thei a ni a; chuvangin hnaih lutuk loh chu a him. I hnaih lo mai ang u. Generator khu hip loh te pawh a tha alawm.*”

“*Refinery chungchangah a theih chuan Mizorama dah chu kan duhthusam a ni a, mahse kan hotute thu a nih mai bakah kan company piah lam thil a ni a, tunah ka chhang mai thei lo a ni e.*”

7. **Pu P.C. Lalsangzuala, Tlungvel Vengthar YMA President:**

“Khawi atangin nge hna hi in hmuh a, engtin nge helai hmun hi beiseina chang in hriat? Hmun dangah khawiah nge laih in tum? Helai hmun in thlan chhan hi eng nge ni? Engtik atangin nge hma in lak tan dawn? Pollution chungchangah chuan nangmahnin in veng turah kan ngai.”

OIL: “A hmun thlan chhan hi thil chi nga vel a awm a. A hmasa berah chuan kum 2007 atang khan Geological modeling kan nei a, tahchuan kan block chhung leilung kan zir thuakna atangin zir chian lai tur bik kan thlang. A pahnihna chu 2-D seismic kan ti a, meter 23-30 a thuka lei verhin halpuah kan hal a, mihringin a nghawr kan hriat phak loh, lirnghing tehna ang chi khan hmun hrang hrang atangin a lo teh a, chu mi reading rawn inpe chhawng chuan leilung chhungril inthuahthip dan kha a rawn lantir a ni. Pathumna chu ‘Geochemical’ kan ti a, hmun hrang hrang atangin lung kan la a, laboratory-ah oil hnuhma a awm em tih kan en a. Chumi dawt lehah chuan Geo chemical tho, technology thar ber zinga mi USA a WL Core technology hmangin, pen tiat vel hi leiah thuk vak lovin ni 14 chhung kan phum a, chumi hnuah saidawium chhin boruak engmah chhuah theih lohnaah dahin, sap ramah kan thawn ta a, a chhungah oil emaw, gas emaw molecule kha a lo bet em tih kha an lo en ta a. Kan phumna hmun kha kan chhinchhiah vek avangin oil/gas awmna awm vel kan hre thei ta a ni. A pali-na chu lei khi leh leilung inthuahthip dante kan zir leh a. A panganaah kan thil zir chu hmun dangte nen a inkaihhnawih em tih kan zir leh bawk a. Satellite imaginary, thlalak hmangin khang hmun zawng zawng kha kan chuktuah khawm a, a hmun hi kan thlang ta a ni.”

“Phulmawi, Maubuang, Thenzawl leh Darlungah te verh kan tum.”

“Sorkarah hna thawh tan theihna kan dil mek a, an remtih chuan tun kumah pawh kan tan nghal ang.”

8. **Pu P.T Thanglura, M/S Teacher Tlungvel:**

“In lo kal hma hian khawtlang nu leh pa teah Air Pollution chungchangah inhnialna a tam hle a, mi thenkhat chuan a verhna atanga Km 5 chin chu a hlauhawm an ti a, thenkhatin Km 10 chin an ti bawk a, Carbon a chhuak nasa dawnin kan hre si a, chu chu thil ni thei a ni

em? Nichinah khan hung pawnah pawh huan in nei thei in ti si a, kan va intihlum phung mai awm ve carbon a tam dawn si a. Tin, hmundangte pawh in thlang a, in zirna hrang hrang atangin Phulmawi hi a eng zatna nge? A tha ber a ni em?”

OIL: “*Km 5 huam chin a hlauhawm tih kha chu tih mai mai a ni. An lo sawi duham deuh hlek niin ka hria. Metre 500 vel aia hlaa awm chu a tha, kangmei chhuah palh thulhah pawh, generator thawm avang pawhin mut a lo har phah mai thei bawk a. km 5, km 10 tih vel em em kha chu an lo sawi uar ve a ni.*”

“*Kawng atanga kalkhan remchang kan zawng a, a panna hnai hnai kan thlang a, a tha ber tih thuah chuan a 2-na vel in niin ka hria.*”

“*Pollution chungchangah chuan, carbon a chhuak teuh ang i tih kha carbon ber chu a ni kan zawn. Khawlaia motor lian tlan vel hian CO (carbon monoxide) a phuhchhuak a, mahse kan generator hman turah hi chuan chutiang carbon hlauhawm chi chu kan zir chianna atanga a landanin kan beisei lo, a lo awm palh anih chuan a treatment chu a awm ngei ang.*”

P.T Thanglura, M/S Teacher Tlungvel (zawh belhna):

“*JCB te, Bulldozer hnathawk mai ah pawh hian vaivut khu hi a tam em em mai a, nangni khawl pheih chu a lian dawn ropui si a, kan lo hlauhthawn ang chi vaivut khu nasa lutuk ang kha a awm dawn lo tihna a ni maw?*”

OIL: “*Khawl khu ngun ngun kha chu a awm lo ang.*”

P.T Thanglura, M/S Teacher Tlungvel (zawh belhna):

“*In verhna tur hmunah huan lo ram kan nei a, chu chu LSC pawh ni lo, periodic patta pawh ni lo keimahni VC atanga kan lo neih te a ni hlawm a, chuan in lo thawk a nih chuan kan nei thei dawn si lo a, Phulmawi ami te, Tlungvel ami te pawh kan ni ang, chungte tan chuan a awm tawk compensation min pe thei dawn lawm ni?*”

OIL: “*Ram chungchang kha chu kan Chairman zahawm tak hian min chhan sak teh se.*”

Chairman: *“Compensation chu a verhna hmun atana company-in a mamawh ram kan acquire dawn a, a panna tur kawng atan pawh kan acquire dawn a. Kha mi huamchhunga ram nei ten an pass neih dan a zirin LSC, Periodic patta, VC pass ang chiah khan an pass neih dana zirin compensation chu an hmu ang. Tin, a ram bakah huanthlai kha chu eng pass pawh ni se kan acquiring area a nih chuan sorkar approve rate-in chhutchhuah a ni ang a. Kan lak tur pawn ni si, metre 500 huam chhung ni bawk siah kha chuan ‘Company lamin compensation kan pe thei lo,’ an ti a ni. Keini erawh chuan kan tih tur chu company tana kan ram laksak tur chin, approach road leh drilling location chhung leh huan thlai atan a tih theih a, chu mi pawn chin 500m huam ang chi pawh ni se compensation kan pe thei lo ang.”*

9. **Pu Zakunga, Tlungvel lo neitu”:**

“Refinery mawlh kha Silchar-ah te an ti mai ang tih kan hlau. Assam ang khan buaina te a chhuah lohna turin Mizoramah ngei bun sela ka duh a ni.”

10. **Pu Saihlira Sailo, VC member Tlungvel:**

“Helai hmun a hna in thawh dawn chuan khawchhungah ngei kawng tlang se kan duh a ni. Hmun danga kawng a tlang a nih chuan kan reserve ngaw hi kan hum thei dawn lo va, awlsam taka relhruk mai theih a ni dawn a, helai hmunah kawng a tlang a nih chuan kan lo hmu thei dawn a, tuman kan reserve ngawa thing te hi an la ngam dawn lo a ni.”

TLANGKAWMNA:

Hemi zawh hian minute chhiar a ni a, siam that ngaite siam that a nih hnuah Chairman-in hming a ziak hnan a. Pu C. Laldinkima, Geologists, Oil India Limited, Duliajan, Assam-in mipui hnenah lawmthu sawiin, Chairman-in a ti tawp ta ani.